

Prevene no Hatán bá Violénsia Bazéia bá Jéneru

Diskursu husi Sekretaria Estadu ba Promosaun Igualdade Sra. Idelta Maria Rodrigues
iha Seminariu “Prevene no Hatan bá Violénsia Bazeia bá Jéneru bá Parsería Rede Referál”
Díli, 11 Setembru 2007

Reprezentante UNFPA, Sr. Dr. Hernando Agudelo
Distintu Konvidadu Sira
Señor no Señora Sira
Benvindu bá ita hotu iha Hotel Timor dadeer ida ne'e.

Semináriu kona-ba “Prevene no Hatan bá Violénsia Bazéia bá Jéneru bá Parsería Rede Referál”, liu hosi kolaborasaun no suporta hosi SEPI no UNFPA.

Ita bo'ot barak mak hatene ona, Governu oras ne'e dau-daun servisu hamutuk ho ONG balun ne'ebé servisu ona iha área ne'e hahú iha 1999 atu hametin servisu rede báziku ne'ebé iha tiha ona bá vítima violénsia doméstika, asaltu seksual no abuzu bá labarik. Ho faktu katak servisu rede báziku ida eziste tiha ona iha Timor-Leste nudar buat bo'ot ida ne'ebé atinje ona. Servisu hirak ne'e establese alargamente husi báze bá leten, tanba servisu maka'as no dedikasaun husi buat ida ki'ik oan maibé konselleiru, membru polísia, advogadu, traballadór Sosiál no profisional saúde nian ne'ebé espesializadu bá jéneru.

Oras ne'e dau-daun, iha kategoria prinsipál ha'at kona-ba servisu xave bá vítima violénsia bazéia bá jéneru nian iha nasaun laran – hirak ne'e maka (1) Polísia (Unidade Ema Vulnerável nian), (2) Servisu Médiku/Saúde, (3) Servisu Psikososial no (4) Servisu Jurídiku.

Servisu

Iha 2001 unidade espesial ida husi forsa Polísia Nasionál, Unidade Ema Vulnerável nian (VPU) estabesidu atu assiste vítima bá asaltu seksual, asedu seksual, violénsia doméstika, abuzu bá labarik no ema vulnerável sira seluk, hanesan vítima tráfik nian. Normalmente, VPU maka pontu kontaktu bá dahuluk bá vítima hirak hanesan ne'e.

Iha Ospital Nasionál Díli, vítima kona-ba violénsia bazéia bá jéneru maka simu tratamentu médiku emerjénsia, inklui ezaminasaun forénsika, teste STI (moras seksual hadaet) no mós akonsellamentu bá trauma no “Fatin Hakmatek” halo husi PRADET, ne'ebé fó garantia bá privasidade no seguransa. PRADET mós halao vizita bá uma kain ida-idak no apoia atividade grupu vítima/sobrevivente ka mate-restu violénsia bazeia bá jéneru nian.

Dalaruma labarik sira, ne'ebé fizikamente hetan abuzu ka hetan asaltu seksualmente, apresenta tiha ona bá PRADET, maibé Ministériu Solidariedade Sosiál la hetan informasaun relasiona ho kazu ne'e.

Oras ne'e dau-daun seidauk iha entendimentu ida lolos entre ajénsia governu balun ho ajénsia ONG kona-ba servisu ne'ebé ida-idak tenke fó ka oferece. Nune'e komunikasaun formál no relasaun entre

ONG ho departamentu governu nian presiza atu hametin liu-tan ho kna'ar no responsabilidade bá ONG ida-idak, polísia ho indivídu iha departamentu governu ne'ebé relevante presiza atu hetan klarifikasaun klean liu-tan.

Hein enkuadramentu jurídiku ne'ebé seidak iha, parseiru referál tenke servisu maka'as atu aseguza katak vítima sira simu asisténsia ne'ebé di'ak ho lalais no mós iha continuidade ne'ebé apropriadu, ne'ebé bele halao husi membru responsável identifikadu iha rede laran. Tanba ida ne'e ita hotu halibur hamutuk iha loron ida ne'e – hakat pasu ida liu-tan bá oin atu:

- Hatene natureza kona-ba forma hotu-hotu relasiona bá violénsia bazéia bá jéneru iha Timor-Leste, inklui prinsípiu katak violénsia doméstika ne'e krime ida, tuir lei ne'ebé vigora.
- Konkorda iha entendimentu ida ne'ebé komun kona-ba prinsípiu kuidadu bá vítima/mate-restu sira husi violénsia doméstika, asaltu seksual no abuzu bá labarik;
- Fó bá ita bo'ot sira informasaun kona-ba prátika ne'ebé di'ak relasiona ho oinsa komunika no fó apoiu bá mate-restu sira;
- Aseguza klaridade kona-ba knar no responsabilidade parsériu nian iha prosesu referál.

Problema seluk

Waihira ita koalia kona-ba servisu referál, ita tenke hanoin katak ita maka prinsipalmente koalia kona-ba apoiu servisu iha Díli deit. Oras ne'e dau-daun, iha servisu oituan ne'ebé fora husi kapital Díli bá vítima sira no PRADET, FOKUPERS, JSMP VSS no MSS hotu-hotu simu referál husi distritu, maibé sira seidak iha rekursu ema no finansa atu hari'i edifísiu permanente iha distritu hotu-hotu.

Nesesidade atu estabese apoiu servisu iha distritu-distritu hirak ne'e urjente no tenke enfrenta husi parseiru hotu-hotu rede referál nian.

Mós, maske iha vítima sira maka mai relata sira nia kazu, sira sei hasoru obstáklu lojístiku ne'ebé prevene sira atu komunika ho Polísia, hanesan laiha telefone, laiha transporte no mós dook husi estasaun Polísia, laiha apoiu husi membru família nian. Dalabarak responsabilidade família nian, inklui ameasa husi alegadu abuzadór, prevene sira atu sai husi uma. Liu-liu, vítima sira dalabarak persebe Polísia laiha kapasidade atu rezolve kazu ka sira nian kanek ladun todan ida atu rezolve sira nia kazu ho sériu.

FOKUPERS nudar ONG lokal feto nian, halao mós fatin seluk hanesan “uma mahon” iha Díli bá vítima violénsia bazéia bá jéneru no abuzu bá labarik. Maske ONG ida maibé servisu ne'e hetan mandatu ida husi Governu. FOKUPERS durante ne'e fó tiha ona asisténsia maka'as bá vítima violénsia bazéia bá jéneru nian hahú 1997. Uma mahon maka dala barak sai fatin bá Polísia no ONG seluk refere/enkamiña vítima sira ne'ebé iha neseseidade atu hetan apoiu no akomodasaun no mós fó programa akompañamentu komprénsiva ida bá vítima sira, fó akonsellamentu ne'ebé di'ak, terapia, akonsollamentu jurídiku no mós mediasaun.

Husi JSMP, Servisu Apoiu bá Vítima ka VSS estabesidu iha Abril 2004 ho orsamentu husi UNFPA no fó asisténsia jurídiku bá vítima sira kona-ba violénsia bazéia bá jéneru wainhira kazu sira refere bá Polísia ho/ka Gabinete Prokuradória. Sira servisu besik liu bá VPU, PRADET ho FOKUPERS no aumenta tiha ona sira nia servisu signifkativamente wainhira komesa hahú servisu ne'e.

Ministériu Solidariedade Sosiál hetan mandatu husi Governu atu presta apoiu Sosiál no asisténsia

umanitária bá membru ne'ebé vulnerável mai husi comunidade inklui fetu, labarik, katuas/ferik, alezadu no labarik sira. Establese tiha ona uma comunidade nian balun bá ema vulnerável iha comunidade, hanesan vítima bá violénsia bazéia bá jéneru no ho esperansa katak ida ne'e bele halao iha futuro.

Ikus liu, Gabinete Prokuradória Jerál maka autór xave jurídiku ida tan iha rede apoiu bá servisu ne'e merese atu mensiona iha ne'e. Maske la fó servisu klean liu bá ida ne'e, maibé dala ruma simu keixa diretamente no nune'e mós funsiona hanesan pontu bá enkamiñamentu/rujukan bá servisu sira seluk iha rede nia laran.

Dezafiu

Iha buat hirak hotu ne'ebé signifikante ita atinje, iha ne'ebá iha dezafiu barak ne'ebé ita tenke enfrenta ka hasoru, laos dehan katak iha ne'ebá laiha báze ida ne'ebé klaru bá servisu rede referál. Prosesu atuál rede referál nian ne'e informadu teb-tebes no ida ne'e dezenvolve organikamente iha tinan balun liu bá, dala barak bazéia bá servisu hamutuk ho intensaun ne'ebé di'ak ho kolega sira iha organizaun referál ida-idak.

Iha mundu ida ne'ebé ideal, VPU sei normalmente refere kazu ida bá Ospital Nasionál Díli ho/ka fatin hakmatek PRADET bá tratamentu médiku emerjénsia no akonsellamentu. Iha kazu sira ne'ebé vítima ho idade ki'ik oan tinan 18 bá kraik, sira tenke refere/enkamiña bá departamentu relevante iha Ministériu Solidariedade Sosiál nian, ne'ebé iha responsabilidade bá protesau no fatin atu labarik sira ne'ebé iha risku nia laran, inklui sira ne'ebé maka hetan asaltu seksual, antes ikus liu refere/enkamiña bá FOKUPERS no VSS iha JSMP.

Infelizmente, laos kazu hotu-hotu tuir rede referál ida ne'e. Vítima barak apresenta kazu diretamente bá FOKUPERS, eskritóriu PRADET ka mós bá OPE antes bá Polísia. Dalaruma, kliente FOKUPERS nian la habituadamente refere bá VSS hosi JSMP maibé sira fó assisténsia jurídika no/ka halo mediasaun rasik.

Bá atensaun, hau hato'o obrigada wain.